

Á Mesa do Parlamento

María Dolores Toja Suárez, Noela Blanco Rodríguez e Julio Torrado Quintela, deputadas e deputado pertencentes ao Grupo Parlamentario dos Socialistas de Galicia, ao abeiro do disposto no artigo 152 do Regulamento da Cámara, presentan ante esa a seguinte pregunta para a súa resposta oral na Comisión 5ª.

Partido dos
Socialistas
de Galicia

A orde do 7 de abril de 2017 que regula a oferta de prazas xuvenís dentro do programa Campaña de verán 2017, establece que a “Consellería de Política Social, en aplicación do principio da transversalidade das políticas en materia de discapacidade, considera pertinente que, ademais das actuacións específicas dirixidas ás persoas con discapacidade, se teñan en conta as necesidades e demandas destas persoas nas políticas e liñas de acción de carácter xeral en calquera dos ámbitos de actuación pública, como é o ámbito de actuación das políticas dirixidas á xuventude galega”. A referida Orde, na súa exposición de motivos, declara a moi encomiable pretensión de alcanzar a inclusión dos mozos e mozas con discapacidade, favorecer a interacción e a convivencia entre toda a mocidade.

Non obstante, no art. 3.3 establece que “para ser admitido no campamento, será necesario non padecer enfermidade con risco de contaxio, nin trastorno de conduta e/ou de comportamento que dificulte a convivencia”.

Desta maneira, establecendo esa exclusión con carácter xeral, sen limitación ou condición algunha, exclúese tamén dos referidos campamentos a calquera persoa moza que padeza trastorno de conduta ou comportamento que dificulte a convivencia. E iso, incluso a pesar de que o dito trastorno ou conduta é precisamente, a causa da súa discapacidade.

Iso dedúcese da mención que se realiza na mesma orde, xa no seu artigo 5, cando se establece:

“As persoas que teñan unha discapacidade igual ou superior ao 33 % poderán participar nesta convocatoria cumprindo os seguintes requisitos:



Grupo Parlamentario

a) Facer constar a súa condición no apartado que figura no seu impreso de solicitude, a fin de planificar os apoios persoais necesarios se os precisase.

b) Que no certificado de recoñecemento de discapacidade non se recolla a necesidade de axuda de terceira persoa.

c) Ter capacidade de integración nun grupo e que as súas limitacións e/ou necesidades especiais lles permitan participar e beneficiarse das actividades para desenvolver no destino que soliciten. A programación de actividades e as características das instalacións de cada campamento poderanse consultar na páxina web de xuventude ((www.xuventude.xunta.es)).

Partido dos
Socialistas
de Galicia

Os requisitos sinalados anteriormente serán condición necesaria para a admisión da solicitude e o seu incumprimento non permitirá a participación da persoa solicitante no campamento.

As persoas solicitantes con discapacidade que cumpran os requisitos sinalados deben optar, de conformidade co artigo seguinte, por unha destas dúas vías: polo procedemento xeral ou polo procedemento das prazas reservadas para inclusión, de modo que quedarán excluídas no caso de que presenten a solicitude por ambos os procedementos.”

Da forma que está redactado e da súa localización, dedúcese claramente que non se establece na referida orde ningunha excepción á rigorosidade da cláusula excluínste prevista no art. 3.3 da Orde.

Resulta así que todas aquelas persoas que tendo un trastorno de conduta que dificulte a convivencia, e aínda que puidesen beneficiarse das actividades para desenvolver no destino, e tivesen capacidade de integración no grupo, quedan expresamente excluídas da posibilidade de participar nos referidos campamentos.

Esta orde supón unha infracción de preceptos constitucionais, de liberdades e dereitos fundamentais e doutras normas do noso ordenamento xurídico.



Grupo Parlamentario

Por iso as deputadas e o deputado que asinan formulan as seguintes preguntas:

1ª) É coñecedor o Goberno galego de que a limitación prevista no art. 3.3. da orde do 7 de abril de 2017 supón na práctica que mozos e mozas que conviven diariamente en centros escolares da nosa comunidade autónoma en situación de plena integración poden ser excluídos da súa participación no programa Campaña de verán 2017?

Partido dos
Socialistas
de Galicia

2ª) Por que razón incluíu o Goberno galego a dita limitación?

3ª) Ten previsto o Goberno galego poñer en marcha algún tipo de medida para incluír aqueles colectivos, que tendo en conta o art. 3.3. da orde do 7 de abril de 2017, quedan excluídos da oferta de prazas xuvenís dentro do programa Campaña de verán 2017?

Pazo do Parlamento, 23 de maio de 2017

Asinado dixitalmente por:

María Dolores Toja Suárez na data 23/05/2017 17:28:39

Noela Blanco Rodríguez na data 23/05/2017 17:28:53

Julio Torrado Quintela na data 23/05/2017 17:29:03